

## ***Licenca za rad na teritoriji druge države***

**PITANJE:** Da li smo obavezni platiti porez po odbitku na isplatu po fakturi stranoj komori za dozvolu - licencu za rad na teritoriji druge države? - pita pretplatnik iz Živinica.

**ODGOVOR:** Prema članu 41. stav 1. Zakona o porezu na dobit („Sl. novine FBiH“, br. 97/07 i 14/08), porez po odbitku predstavlja porez koji se obračunava na prihod koji je nerezident ostvario na teritoriji Federacije BiH.

Saglasno stavu 2. istog člana Zakona, porez po odbitku obračunava i uplaćuje isplatilac kod isplate prihoda. Isplatilac je dužan u roku 10 dana od dana isplate podnijeti izvještaj Poreznoj upravi o obračunatom i uplaćenom porezu po odbitku.

Prema članu 41. tačka 3. alineja 5. Zakona o porezu na dobit, osnovica na koju se obračunava porez po odbitku je bruto iznos koji isplaćuje rezident Federacije BiH nerezidentu, između ostalog i na druge usluge koje su obavljene na teritoriji FBiH.

Članom 4. stav 5. Pravilnika o primjeni Zakona o porezu na dobit („Sl. novine FBiH“, broj 36/08) propisano je da se pod uslugama nerezidenata, iz stava 4. ovog člana, podrazumijevaju i usluge izvršene van teritorije Bosne i Hercegovine, a koje se na osnovu ispostavljene fakture nerezidenta ili po drugom osnovu naplaćuju od rezidenta Federacije BiH.

Prema tome, u konkretnom slučaju, usluga izdavanja licence izvršena je na teritoriji druge države, nerezident je ispostavio fakturu vašem pravnom licu - rezidentu FBiH, te ste dužni da obračunate i uplatite porez po odbitku od 10 odsto na osnovicu koju čini bruto isplaćeni iznos. ■

***Fuad BALTA, dipl. ecc.***